

„ՀԱՅԱՍՏԱՆԻ ՖԻԶԻԿԱԿԱՆ ԿՈՒՆՏՐԱՅԻ ԵՎ ՍՊՈՐՏԻ ՊԵՏԱԿԱՆ ԻՆՍՏԻՏՈՒՏ,,
ՀԻՄՆԱԴՐԱՄԻ
ԿՈԼԵԿՏԻՎ ՊԱՅՄԱՆԱԳԻՐ

ք.Երևան

02.04.2019թ.

1. ԸՆՀԱՆՈՒՐ ԴՐՈՒՅԹՆԵՐ

1.1 Սույն կոլեկտիվ պայմանագրի կողմեր են հանդիսանում «Հայաստանի ֆիզիկական կուլտուրայի և սպորտի պետական ինստիտուտ» հիմնադրամը, ի դեմս ռեկտոր Վ.Բ.Առաքելյանի (հետագայում «Գործատու») և «Հայաստանի ֆիզիկական կուլտուրայի և սպորտի պետական ինստիտուտ» հիմնադրամի աշխատողների կոլեկտիվը, ի դեմս արհեստակցական կազմակերպության ընտրովի մարմնի ղեկավար՝ արհկոմիտեի նախագահ Ա.Անդրիկյանի (հետագայում «Արհեստակցական կազմակերպություն»):

1.2 Կոլեկտիվ պայմանագիրը գործատուի (գործատուի ներկայացուցչի) և աշխատողների ներկայացուցիչների միջև գրավոր ձևով կնքված կամավոր համաձայնություն է, որը կարգավորում է աշխատողների և գործատուների միջև աշխատանքային հարաբերությունները:

1.3 Սույն կոլեկտիվ պայմանագրի առարկան գործատուի կողմից աշխատողների աշխատանքի պայմանների, աշխատանքի վարձատրության և դրանց հետ կապված սոցիալական ու իրավական հարցերի լուծման համար տրամադրվող երաշխիքների և արտոնությունների վերաբերյալ Հայաստանի Հանրապետության համեմատ, լրացուցիչ դրույթների սահմանումն է:

1.4 Սույն կոլեկտիվ պայմանագրի դրույթներին իրականացնելիս գործատուն առաջնորդվում է Հայաստանի Հանրապետության սահմանադրությամբ, Հայաստանի Հանրապետության աշխատանքային օրենսգրքով, Հայաստանի Հանրապետության օրենքներով, այլ նորմատիվ իրավական ակտերով, ինչպես նաև ՀՖԿՍՊԻ կանոնադրությամբ ու ներքին իրավական ակտերով:

1.5 Կոլեկտիվ պայմանագիրը կոչված է բարելավելու աշխատողների աշխատանքային պայմանները: Աշխատանքի և հանգստի պայմանների բարելավման նպատակով կատարվող կամ պլանավորված բոլոր ծրագրերը, որոնք իրականացվում են կողմերի նախնական համաձայնությամբ, համարվում են կոլեկտիվ պայմանագրի անբաժան մաս:

1.6 Կոլեկտիվ պայմանագրի կողմերը պարտավորվում են համագործակցել սոցիալական գործընկերության հիմնական սկզբունքներով և իրականացնել աշխատողների և գործատուի շահերի համաձայնեցումը կոլեկտիվ աշխատանքային հարաբերություններում:

2. ԱՇԽԱՏԱՆՔԱՅԻՆ ՀԱՐԱԲԵՐՈՒԹՅՈՒՆՆԵՐԻ ԿԱՐԳԱՎՈՐՈՒՄԸ

2.1 Աշխատողի հետ աշխատանքային հարաբերությունները ծագում են աշխատողի և գործատուի կամ նրա կողմից լիազորված անձի հետ գրավոր աշխատանքային պայմանագիր կնքելու միջոցով: Աշխատանքային պայմանագիրը ներառում է գործատուի և աշխատողի բոլոր իրավունքները և պարտականությունները, ինչը բխում է կատարվող աշխատանքի առանձնահատկություններից:

Աշխատանքային օրենսդրությամբ սահմանված կարգով գրավոր աշխատանքային պայմանագիրը կնքվում է երկու օրինակից՝ կողմերի ստորագրությամբ մեկ փաստաթուղթ կազմելու միջոցով:

2.2 Աշխատանքային պայմանագրի պայմանները չեն կարող վատթարացնել աշխատողի աշխատանքի պայմանները գործող օրենսդրության, ինչպես նաև սույն կոլեկտիվ պայմանագրի համեմատ:

2.3 Գործատուն և աշխատողները պարտավորվում են կատարել աշխատանքային պայմանագրով նախատեսված պայմանները: Գործատուն իրավասու չէ պահանջել աշխատողից կատարել աշխատանք, որը նախատեսված չէ աշխատանքային պայմանագրով, բացառությամբ օրենքով սահմանված դեպքերի:

2.4 Ինստիտուտի աշխատողների թվաքանակի կրճատման հետ կապված հարցերը գործատուն լուծում է արհեստակցական կազմակերպության հետ խորհրդակցելով:

2.5 Գործատուն կրճատումներից առնվազն երկու ամիս առաջ ծանուցում է աշխատողներին այդ մասին և տրամադրում շաբաթական 4 ժամ տևողությամբ ազատ ժամանակ՝ նրանց նոր աշխատանք փնտրելու համար՝ պահպանելով հիմնական աշխատավարձը:

2.6 Աշխատանքում թողնելու նախապատվությունը, բացի օրենքով նախատեսված աշխատողների, տալ նաև հետևյալ աշխատողներին.

- 1) կենսաթոշակային տարիքից մինչև 5 տարի պակաս տարիք ունեցող, 20 տարի և ավել ինստիտուտում աշխատած աշխատակիցներին,
- 2) միայնակ ծնողներին, որոնք խնամքի տակ ունեն անչափահաս կամ հաշմանդամ երեխա:

2.7 Գործատուի նախաձեռնությամբ արհեստակցական կազմակերպության անդամ հանդիսացող աշխատողի աշխատանքային պայմանագրի լուծումը իրականացնել ՀՀ ԱՕ 119 հոդվածով նախատեսված կարգով:

2.8 Կողմերը պայմանավորվեցին՝ հետևողական աշխատանք տանել ինստիտուտում լրացուցիչ ֆոնդեր ստեղծելու և կենսաթոշակի տարիքի հետ կապված աշխատանքից ազատված ինստիտուտի վաստակաշատ աշխատակիցներին ամենամյա որոշակի նպաստ հատկացնելու ուղղությամբ:

3. ԱՇԽԱՏԱԺԱՄԱՆԱԿ, ՀԱՆԳՍՏԻ ԺԱՄԱՆԱԿ

3.1 Ինստիտուտում աշխատողների համար սահմանված է հնգօրյա աշխատանքային շաբաթ՝ երկու հանգստյան օրով՝ շաբաթ և կիրակի:

3.2 Ինստիտուտում աշխատաժամանակի տևողությունը չի կարող գերազանցել շաբաթական 40 ժամը: Պրոֆեսորադասախոսական կազմի համար աշխատաժամանակի տևողությունը սահմանվում է շաբաթական 36 ժամ:

3.3 Հանգստի և սնվելու համար ընդմիջման սկիզբը սահմանված է ժամը 13.00, իսկ ավարտը՝ 13.30: Հանգստանալու և սնվելու ընդմիջման ժամանակահատվածը չի մտնում աշխատաժամանակի մեջ և աշխատողը կարող է այն օգտագործել իր հայեցողությամբ:

3.4 Աշխատողներն իրավունք ունեն օգտվելու վճարովի և այնվճար արձակուրդի իրավունքից: Ամենամյա վճարովի արձակուրդների ժամանակացույցը հաստատվում է մինչև տվյալ օրացուցային տարվա հունվարի 15-ը:

3.5 Մինչև անընդմեջ աշխատանքի վեց ամիսը լրանալը աշխատողի խնդրանքով ամենամյա արձակուրդ տրամադրել՝

- 1) առողջարանային բուժման կարիք առաջանալու դեպքում
- 2) երեխայի բուժման կարիք առաջանալու դեպքում:

3.6 Կողմերի համաձայնությամբ աշխատողին կարող է մեկ տարվա ընթացքում տրամադրել չվճարվող արձակուրդ ոչ ավելի, քան երեսուն օր:

4. ԱՇԽԱՏԱՆՔԻ ՎԱՐՉԱՏՐՈՒԹՅՈՒՆ

4.1 Հետևողականորեն իրականացնել միջոցառումներ ինստիտուտի բյուջեի (պետական բյուջեի և արտաբյուջեի միջոցներով) ընձեռած հնարավորությունների սահմաններում բոլոր աշխատողների իրական աշխատավարձի բարձրացման ուղղությամբ:

4.2 Աշխատանքի ծավալի ավելացման դեպքում սահմանել աշխատանքի վարձատրության հավելում՝ հիմնական աշխատավարձի մինչև 50 տոկոսի չափով, ինստիտուտի սեփական միջոցների հաշվին:

4.3 Հերթափոխային, արտաժամյա, հանգստյան և տոնական օրերին կատարած աշխատանքը վարձատրվում է Հայաստանի Հանրապետության օրենսդրությամբ սահմանված կարգով:

4.4 Աշխատավարձը վճարել յուրաքանչյուր ամսվա համար մինչև հաջորդ ամսվա 15-ը:

4.6 Ամենամյա արձակուրդի համար աշխատավարձի վճարումն իրականացնել ոչ ուշ, քան արձակուրդը սկսելուց երեք օր առաջ:

5. ԱՇԽԱՏԱՆՔԱՅԻՆ ՊԱՅՄԱՆՆԵՐ

5.1 Գործատուն պարտավորվում է՝

5.1.1 Գործող իրավական ակտերի պահանջներին համապատասխան յուրաքանչյուր աշխատողի համար ապահովել կահավորված, անվտանգ, հարմար և առողջության համար անվնաս աշխատատեղ և շրջապատող միջավայր:

5.1.2 Սահմանել հատուկ մասնագիտական գիտելիքներ պահանջող աշխատանքների ցանկը, որակավորման պահանջները և որակավորման քննությունների անցկացման կարգը:

5.1.3 Մշակել յուրաքանչյուր աշխատանք կատարելու համար անվտանգության ապահովման հրահանգ

5.1.4 Անցկացնել աշխատանքի անվտանգ կատարման կանոնների ուսուցում և հրահանգավորում (նախնական, աշխատատեղում և ընթացիկ)

5.1.5 Չթույլատրել աշխատողին անցնելու աշխատանքային պարտականությունների կատարմանը առանց աշխատանքի անվտանգության կանոնների ուսուցում կամ հրահանգավորում անցնելու:

5.1.6 Աշխատողին տրամադրել աշխատանքի բնույթին համապատասխան հատուկ հագուստ, հատուկ կոշիկ, անհատական պաշտպանության այլ միջոցներ ինչպես նաև անհատական հիգիենայի առարկաներ:

5.1.7 Կախված իրականացվող աշխատանքի վտանգավորության աստիճանից հաստատել պարտադիր և պարբերական բժշկական զննություն անցնող աշխատատեղերի ցանկը և ժամանակացույցը:

5.1.8 Աշխատողների պարտադիր և պարբերական բժշկական զննությունը իրականացնել աշխատանքային ժամերին, գործատուի հաշվին:

5.1.9 Համապատասխան ծառայություններին ժամանակին ապահովել անհրաժեշտ տեխնիկական փաստաթղթերով:

5.1.10 Ստեղծել աշխատողների անվտանգության ապահովման և առողջության պահպանման հարցերով հանձնաժողով:

5.1.11 Ընդունել նորմատիվ իրավական ակտեր, որոնցով սահմանվում է աշխատանքի ժամանակավորապես դադարեցումը՝ եթե աշխատատեղում առաջացել են աշխատանքի անվտանգության ապահովման պայմանների հետ անհամատեղելի պայմաններ:

5.2 Արհեստակցական կազմակերպությունը պարտավորվում է՝

5.2.1 Աջակցել գործատուի կողմից աշխատանքի անվտանգության և առողջության պահպանման ուղղությամբ տարվող միջոցառումների իրականացմանը:

5.2.3 Հարկ եղած դեպքերում առաջարկություն ներկայացնել գործատուին կատարվելիք այն աշխատանքների վերաբերյալ, ինչը անհրաժեշտ է իրականացնել առանձին աշխատատեղերում աշխատանքի անվտանգության և առողջության պահպանման վիճակի բարելավման համար:

5.2.4 Ներկայացնել առաջարկություն աշխատանքի ժամանակավորապես դադարեցման համար, եթե աշխատատեղում առկա են օրենքով և նորմատիվ իրավական ակտերով սահմանված աշխատանքի անվտանգության պահպանման կանոնների կոպիտ խախտման դեպքեր:

5.2.5 Մշտական հսկողություն իրականացնել մայրության պաշտպանության վերաբերյալ օրենքով սահմանված երաշխիքների և արտոնությունների կիրառման խնդիրների նկատմամբ:

5.3 Կողմերը պայմանավորվում են աշխատանքի վայրում դժբախտ դեպքերի և մասնագիտական հիվանդությունների պատճառները պարզելու նպատակով անցկացնել համատեղ ծառայողական քննություն՝ օրենքով սահմանված կարգի շրջանակներում:

6. ՍՈՑԻԱԼԱԿԱՆ ՀԱՐՑԵՐ

6.1 Գործատուն պարտավորվում է՝

6.1.1 Յուրաքանչյուր տարվա փաստացի խնայողության 70 տոկոսը հատկացնել կոլեկտիվի սոցիալ կենցաղային տարբեր խնդիրների լուծման համար, մասնավորապես՝

- 1) աշխատակցի բուժման ծախսերի լրիվ կամ մասնակի փոխհատուցման նպատակով /կոլեկտիվի հատկապես խիստ կարիքավոր անդամներին՝ համապատասխան հիմնավորումների առկայության դեպքում/,
- 2) աշխատողների հանգստի և առողջության պահպանման նպատակով,
- 3) սոցիալապես խիստ անապահով աշխատակիցներին, պատերազմի վետերաններին, հաշմանդամներին ֆինանսական օգնություն տալու համար:
- 4) մշակութային և սպորտային միջոցառումների կազմակերպման համար:

6.2 Արհեստակցական կազմակերպությունը պարտավորվում է՝

- 1) Աշխատողների սոցիալ կենցաղային խնդիրների լուծման համար հատկացնել արհեստակցական կազմակերպության միջոցների մոտ 50% -ը:
- 2) Կազմակերպել կոլեկտիվի անդամների և նրանց ընտանիքների հանգիստը և իրականացնել վերահսկողություն:

7. ԳՈՐԾԱՏՈՒԻ և ԱՐՀԵՍՏԱԿՅԱԿԱՆ ԿԱԶՄԱԿԵՐՊՈՒԹՅԱՆ

ՀԱՐԱԲԵՐՈՒԹՅՈՒՆՆԵՐԸ

7.1 Կողմերը իրենց վրա են վերցնում կոլեկտիվ բանակցությունների ընթացքի կանոնների պահպանման, կոլեկտիվ պայմանագրի կնքման և պարտականաթյունների կատարման պատասխանատվությունը:

7.2 Արհեստակցական կազմակերպությունը իրավասու է աշխատանքային և դրա հետ կապված ինստիտուտի սոցիալ-տնտեսական զարգացման հարցերի վերաբերյալ գործատուին ներկայացնել առաջարկություններ:

Գործատուն պարտավոր է մինչև 15 աշխատանքային օրվա ընթացքում ուսումնասիրել առաջարկությունները և գրավոր պատասխանել արհեստակցական կազմակերպությանը:

7.3 Աշխատողների աշխատանքային և դրա հետ կապված սոցիալական շահերն ու իրավունքները շուշավող որոշումները գործատուն պարտավոր է ընդունել հաշվի առնելով արհեստակցական կազմակերպության կարծիքը, համապատասխան որոշումների (հրամանների) նախագծերը ներկայացնել արհեստակցական կազմակերպությանը, հրամանը հրապարակելու ժամկետից 5 աշխատանքային օր առաջ:

Արհեստակցական կազմակերպությունը պարտավոր է մինչև 2 աշխատանքային օրվա ընթացքում գրավոր հայտնել իր կարծիքը գործատուին:

7.4 Գործատուն երաշխավորում է՝

- 1) ՀՖԿՍՊԻ արհկոմիտեի նախագահին ընդգրկել ինստիտուտի համապատասխան կառավարման մարմինների աշխատանքներում՝ ինստիտուտի կանոնադրությամբ սահմանված կարգով,
- 2) աշխատողների սոցիալ-տնտեսական հարցերի վերաբերյալ տեղեկատվություն տրամադրել արհեստակցական կազմակերպությանը,
- 3) արհեստակցական կազմակերպության գործունեության համար անվճար տրամադրել անհրաժեշտ աշխատասենյակներ, հնարավոր կահավորանքով, ինչպես և համապատասխան սրահներ՝ համաժողովներ անցկացնելու համար,
- 4) արհեստակցական կազմակերպության անդամների դիմումների առկայության հիմքով՝ անդամավճարը գանձել կենտրոնացված կարգով և փոխանցել արհեստակցական կազմակերպության հաշվին տվյալ ամսվա աշխատավարձը վճարելուց հետո, մինչև 10 օրվա ընթացքում,
- 5) արհեստակցական կազմակերպության պահանջով լուծել աշխատանքային պայմանագիրը՝ սույն պարտավորությունների չկատարման հարցում մեղավոր պաշտոնատար անձի հետ:

8. ԵԶՐԱՓՈՒԿ ԳՐՈՒՅԹՆԵՐ

8.1 Սույն կոլեկտիվ պայմանագիրը ուժի մեջ է մտնում ստորագրման հաջորդ օրվանից՝ 03.04.2019թվականին, երեք տարի ժամկետով և գործում է մինչև 2022թվականից ապրիլի 03-ը ներառյալ:

8.2 Գործատուն և Արհեստակցական կազմակերպությունը աշխատողներին ծանոթացնում են կոլեկտիվ պայմանագրի բովանդակության հետ այն ստորագրելու օրվանից 15 աշխատանքային օրվա ընթացքում: Գործատուն պայմանագրի էլեկտրոնային տարբերակը տեղադրում է իր պաշտոնական կայքում՝ այն ստորագրելու օրվանից 5 աշխատանքային օրվա ընթացքում:

8.3 Կողմերից յուրաքանչյուրը վերահսկողություն է իրականացնում սույն պայմանագրով ստանձնած պարտավորությունների իրականացման, ինչպես նաև սույն պայմանագրով սահմանված պայմանների պահպանման և կատարման համար:

8.4 Սույն կոլեկտիվ պայմանագրի գործողության ժամկետի ընթացքում փոփոխություններ և լրացումներ կարող են կատարվել միայն կողմերի փոխադարձ համաձայնությամբ՝ կողմերից մեկի գրավոր ներկայացրած առաջարկությունը մյուս կողմին ներկայացնելու ժամկետից 10 օրվա ընթացքում, համատեղ քննարկման և համապատասխան արձանագրություն կազմելու միջոցով: Կողմերի անհամաձայնության դեպքում՝ այն իրականացվում է օրենքով սահմանված կարգով:

8.5 Կողմերն իրավունք ունեն երկարաձգելու սույն կոլեկտիվ պայմանագրի գործողության ժամկետը երեք տարուց ոչ ավելի ժամանակով:

8.6 Կոլեկտիվ պայմանագրի լուծումը կատարվում է կողմերից յուրաքանչյուրի կողմից՝ այդ մասին գրավոր նախազգուշացնելով մյուս կողմին ոչ ուշ, քան երեք ամիս առաջ:


8.7 Կոլեկտիվ պայմանագրի բոլոր դրույթները ենթակա են կատարման Գործատուի, Արհեստակցական կազմակերպության և բոլոր համար:


8.8 Կողմերից յուրաքանչյուրը պատասխանատվություն է կրում սույն պայմանագրով ստանձնած պարտավորությունների չկատարման կամ ոչ պատշաճ կատարման համար Հայաստանի Հանրապետության օրենսդրությամբ սահմանված կարգով:

8.9 Կողմերը տարին մեկ անգամ տալիս են հաշվետվություն կոլեկտիվ պայմանագրի կատարման մասին: Հաշվետվությամբ հանդես են գալիս սույն կոլեկտիվ պայմանագիրը ստորագրած անձինք:

8.10 Կոլեկտիվ պայմանագիրը ստորագրվել է երկու հավասարազոր օրինակից 2019թվականի ապրիլի 02-ին:

8.11 Կոլեկտիվ պայմանագրի մի օրինակը գտնվում է Գործատուի մոտ, մյուս օրինակը՝ Արհեստակցական կազմակերպությունում:

Գործատուի կողմից՝

Հայաստանի ֆիզիկական կուլտուրայի և
սպորտի պետական ինստիտուտ,
հիմնադրամի ղեկավար Վ.Բ.Առաքելյան

Աշխատողների կողմից՝

Արհեստակցական
Կազմակերպ-Ս
Պրոֆեսիոնալնայ
Օրգանիզացիա
01, Հայաստանի ֆիզիկական կուլտուրայի
և սպորտի պետական ինստիտուտ,
հիմնադրամի արհևոմիտեի նախագահ
Ա.Անդիկյան